

# MENDIYAK.



(ON MARCIAL MARTINEZ AGUIRRE JAUNARI.)

Mendiko umea naiz,  
Mendiya det maite,  
Ez nitzake biziko  
Menditik aparte;  
Eta gaur kalean ¡ai!  
Bizi banaiz ere,  
Ez naiz bizi mendira  
Begiratu gabe!

¡Zêñen ederrak dauden  
Oso zuriturik,  
Elurrezko soñeko  
Orretan bildurik;  
Lengo anai-odólak  
Damuz estaldurik  
Aingeruchoen jantzi  
Garbia arturik!

Otza, išilltasuna,  
Bazter danetatik,  
Zerbait ikusi nai ta  
Ezer ez inondik;  
Ez šaldi, ez betizu,  
Ez auntz, ez ardirik,  
Denak, denak joan dira  
Lurra ¡lo! utzirik.

Egunak badijoaz,  
Ta lurra beti lo,  
Elurra berriz dator  
Gero ta geiago,  
Ta ¡an, ermitan! borda  
Baño aronzago  
Arzaiaren alaba  
Erregutzen dago!

¡Nola, nola ote du  
Gaišoak eskatzen!...  
Elúrrak asten dira  
Bertatik urtutzen,  
Eguzkirikan ez da,  
Eta det pensatzen  
Birjiñak ote duen  
Malko bat išurtzen!

¡Esnatu zaitez lurra,  
Esnatu lenbailen!  
¡Atoz udaberria  
Bazterrak poztutzen!  
Choriak ikusteko  
Kabiak egiten  
Eta bildots chikiak  
Mendiyan jostatzen.

ANTONIO ARZÁC.

1888-ko Marchoaren 3-an.

